



ILIDŽA

INFORMATIVNI BILTEN OPĆINE ILIDŽA

Ilidža • Oktobar 2018
• Broj 175





Održana 19. redovna sjednica Općinskog vijeća Ilidža



Općinsko vijeće Ilidža je na 19. redovnoj sjednici 25. oktobra 2018. godine u Multifunkcionalnoj sali Općine Ilidža donijelo Odluku o izmjenama Odluke o visini komunalnih taksi na području općine Ilidža.

Vijeće je prihvatilo stav Komisije za budžet, privredu i finansije i ekonomska pitanja, koja je konstatovala da je Skupština Kantona Sarajevo, Zakonom o izmjenama i dopuni Zakona o komunalnim taksama, koji je donesen 25. juna 2018. godine, po skraćenom postupku, povrijedila pravo na lokalnu samoupravu i pravo na izvore finansiranja općina u Kantonu Sarajevo jer je smanjila visine komunalnih taksi za pojedine djelatnosti (oblast distribucije nafte i naftnih derivata, oblast bankarstva, oblast vanjske trgovine i trgovine naveliko, oblast ugostiteljstva – hoteli, moteli i pansioni, agencije za nekretnine i itd.) i time prouzrokovala negativan efekat na općinske budžete. Općinsko vijeće zahtijeva da Općina Ilidža putem Pravobranilaštva Općine podnese zahtjev Ustavnom sudu FBiH za zaštitu prava na lokalnu samoupravu i sugeriše da se u ovaj postupak uključe i sve druge općine u Kantonu Sarajevo. Općinsko vijeće Ilidža podržava prijedloge za izmjenu i dopune Zakona o komunalnim taksama Službe za finansije, koji su dostavljeni Ministarstvu finansija Kantona Sarajevo kojim je traženo da se u članu 21. tarifni broj 1. doda nova tačka: „60. uslužna djelatnost u vezi sa zračnim prijevozom 1.000,00 KM“,

obzirom da jedino na teritoriji općine Ilidža ima J.P. Međunarodni aerodrom „Sarajevo“ d.o.o. Sarajevo. Prilikom razreza komunalne takse primjenjuje se približna tarifa koja ne odgovara djelatnosti koju obavlja J.P. Međunarodni aerodrom „Sarajevo“ d.o.o. Sarajevo. Primjenjuju se tarifa od 300,00 KM koja se odnosi na djelatnost - prevoz putnika, te bi trebala biti izdvojena posebna tačka „uslužna djelatnost u vezi sa zračnim prijevozom“ što je u skladu sa registrovanom djelatnošću J.P. Međunarodni aerodrom „Sarajevo“ d.o.o. Sarajevo.

Općinsko vijeće usvojilo je prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Fikret Karić, Vladimir Mijić i Nijaz Salčin, kao i Prijedloge rješenja o rješavanju imovinsko-pravnih odnosa u svrhu legalizacije stambeno-poslovnih objekata po zahtjevima Adis Džaka, Nazim Klica, Ramo Šurović, Vukosava Karabatić, Federalni Zavod za PIO-legalizaciju poslovnog objekta Dom penzionera, te Medžlis IZ Sarajevo. Vijećnici su upoznati i sa Izvještajem nezavisnog revizora firme „Recom“ d.o.o Mostar o obavljenoj reviziji finansijskih izvještaja Općinskog vijeća za 2017. godinu. Općinsko vijeće primilo je k znanju navedeni Izvještaj sa sugestijom da općinski načelnik u saradnji sa nadležnim općinskim službama realizuje sve preporuke navedene revizorske kuće.



Potpisan sporazum za gradnju pruge Ilidža-Hrasnica

U Općini Ilidža 4. oktobra održana je sjednica Vlade Kantona Sarajevo.

Načelnik Općine Ilidža prof. dr. Senaid Memić prezentirao je Vladi KS najznačajnije projekte koje provodi ova lokalna zajednica. Jedan od kapitalnih projekata, a sa čijim detaljima su ih upoznali projektanti IPSA Instituta, je i izgradnja tramvajske pruge prema naselju Hrasnica, čija je ukupna finansijska vrijednost oko 22 miliona KM.

Nakon sjednice potpisan je sporazum o realizaciji projekta izgradnje tramvajske pruge Ilidža - Hrasnica za čiju gradnju će uskoro biti raspisan tender.

Ministar saobraćaja Kantona Sarajevo Mujo Fišo i načelnik Općine Ilidža prof. dr. Senaid Memić potpisali su Sporazum o poslovnoj saradnji za realizaciju projekta izgradnje tramvajske pruge Ilidža-Hrasnica. Sredstva za realizaciju će se osigurati u budžetima Kantona Sarajevo i Općine Ilidža za 2019. i 2020. godinu.

“Ovaj projekt će doprinijeti razvoju Općine Ilidža, odnosno područja Hrasnice. Zajedno s općinom planiramo i druge kapitalne projekte koji se odnose na žičaru, na uspostavljanju boljih saobraćajnih veza sa Hrasnicom, Sokolović- Kolonijom, Stojčevcem i Vrelom Bosne”, naglasio je premijer Adem Zolj.

Ministar saobraćaja KS Mujo Fišo izjavio je da je najvažnije da Vlada KS spremna da krene s realizacijom izgradnje pruge prema Hrasnici.

“Cilj Ministarstva saobraćaja KS jeste da Grad Sarajevo i Kanton Sarajevo dobiju ekološki čisti prijevoz, što znači više tramvaja i trolejbusa, a manje autobusa koji stvaraju emisiju negativnih čestica u zraku. Glavni projekt je u završnoj fazi, očekujemo da će biti gotov u narednih 15-ak dana i tada kreće tender za izgradnju”, naglasio je Fišo.



Načelnik Općine Ilidža prof. dr. Senaid Memić rekao je da je opredjeljenje Općine raditi prugu bez obzira na cijenu.

“Računamo da će četiri tramvaja stalno kružiti na ovoj relaciji. Radimo ovo kao prvu fazu da bi druga faza bila popravak tramvajske pruge skroz do čaršije. Treća faza bi bila spajanje Dobrinje i Nedžarića. Čim krenemo raditi prugu, razmišljamo o kabinskoj žičari do Bjelašnice te kabinska žičara s Vrela Bosne do Golog Brda. Oni koji misle da je ovo utopija, neka za nekoliko mjeseci dođu i slikaju se kraj pruge. Jednostavno, pruge će biti i ona će funkcionisati. GRAS se ne mora zvati GRAS, ali mi moramo imati preduzeće koje će prevoziti ljude, i to ne u ružnim, prljavim i iscertanim tramvajima, već da budu kao i svuda u svijetu, bez obzira na dirigovanu cijenu karte”, dodao je Memić.

Izgradnja pruge do Hrasnice, kaže Memić, otvara puteve Ilidže ka novim investicijama, povratku stanovništva i novim naseljavanjima.

Bezbjednost putnika na kružnom toku na prvom mjestu

Ozbirom na učestala pitanja vijećnika Općinskog vijeća Ilidža koji su iznosili problematiku bezbjednosti pješaka na kružnom toku u centru Ilidže u Općini Ilidža 24. oktobra 2018. godine održan je sastanak koji je inicirala Komisija za sigurnost Općinskog vijeća. Tačka o kojoj se raspravljalo bila je bezbjednost putnika na kružnom toku usljed zaustavljanja tramvaja.

Istina je da su kružni tokovi doprinijeli i boljoj protočnosti prometa i sigurnosti svih sudionika u prometu, ali zaustavljanje tramvaja u kružnom toku izaziva ugrožavanje života putnika.

Na sastanku su doneseni zaključci u kojima su utvrđene konkretne aktivnosti. KJKP GRAS d.o.o bi trebalo da izvrši unutarnju preraspodjelu termina polaska tramvaja sa terminala na kraći vremenski period od dosadašnjeg, kako bi se onemogućilo zaustavljanje u kružnom toku i otvaranje vrata putnicima koji prilikom napuštanja prijevoznog sredstva krše više zakonskih propisa, a prvenstveno ugrožavaju svoju bezbjednost. Policijska stanica Ilidža će izvršiti analizu i uraditi plan aktivnosti na ovom lokalitetu i bit će podrška KJKP

GRAS u rješavanju ove problematike. Jedan od zaključaka na sastanku bio je uključivanje i Direkcije za ceste KS i poduzimanje mjera iz njihove nadležnosti na kružnom toku.

U narednom periodu provest će se i medijska edukativna kampanja, kako bi se uticalo na svijest, a ujedno i na povećanje bezbjednosti u saobraćaju.

Na sastanku su bili prisutni predstavnici Komisije za sigurnost OV, načelnik Pete policijske uprave Ilidža, komandir Pete PU, predstavnik Ministarstva saobraćaja KS, direktor GRAS-a i izvršni direktor za tramvajski saobraćaj, te predstavnik Kantonalne uprave za inspeksijske poslove.





Kružni tok u Sokolović-Kolonji pušten u promet

Na trasi saobraćajnice sa dva kolovoza i tramvajskim pojasom Ilidža-Hrasnica završeni su radovi na izgradnji kružnog toka u Sokolović-Koloniji na raskrsnici ulica Seada Bublina i Hrasničke ceste. Kružni tok je projektovana kao gradska dvotračna kružna raskrsnica vanjskog prečnika 50 metara, širine kružnog kolovoza devet metara i prelaznim (provoznim) kolovozom širine dva metra. Na rondou su urađene pješačka i biciklistička staza promjenljive širine. Na potezu od Ilidže do Hrasnice predviđena je tramvajska pruga koja će prolaziti kroz rondo. Prema funkciji u gradskoj mraži ova saobraćajnica ima rang primarne saobraćajnice prvog reda i predstavlja nastavak glavne gradske magistrale koja se proteže od Marijin dvora do Energoinvesta, a sada i do Hrasnice. Izvođač radova po projektu koji je uradio TZI Inženjering bio je Mevludin Comerc, a nadzor je vršio Zavod za izgradnju Kantona Sarajevo. Vrijednost radova je 627.114 KM koje finansira Općina Ilidža.

Simboličnim presjecanjem vrpce, 16. oktobra 2018. godine, kružni tok je stavljen u promet u prisustvu brojnih zvanica i stanovnika naselja Sokolović-Kolonije. Prisutnima se obratio Jasmin Halebić ministar finansija u Vladi Kantona Sarajevo koji je istakao dosadašnju uspješnu saradnju kantona i općine, te nastavak te saradnje na budućim infrastrukturnim projektima. Načelnik Općine Ilidža, prof. dr. Senaid Memić prisutnima je kazao da je ovo još jedan u nizu uspješno završen projekat, te naglasi da je gotov izvedbeni projekat tramvajske pruge za Hrasnicu i da su obezbjeđena sretstva za njenu izgradnju i da će se uskoro početi sa radovima.

Radovi izgradnje mosta kod OBI-ja teku po planu

Izgradnja pješačkog mosta kod OBI-ja teče planiranom dinamikom. Riječ je o pješačkom mostu namijenjenom povezivanju dviju obala, tačnije jednog dijela Ilidže i industrijske zone. Iako u blizini postoji most za pješake i vozila, on godinama nije pogodan za građane koji žele pristupiti industrijskoj zoni. Izvođač radova je firma Porobić d.o.o, a podizvođač je Pont d.o.o. Nadzor vrši firma In, a radove finansira Općina Ilidža.

Vrijednost ovog projekta je 1.379.823,15 KM. Rok za izvođenje radova je april 2019. godine. Ukupna dužina mosta je 92,65, a širina mosta je promjenjiva i kreće se od 5,26 do 5,30 metara.

Pješački most je projektovan kao kombinovani sistem. Uvođenjem konstruktivnih elemenata ostvarena je ideja spajanja stare ideje rimskog mosta sa novim idejama i principi-



Puštena u promet nova saobraćajnica uz obalu Željeznice

Izgradnja saobraćajnice uz desnu obalu Željeznice od raskršk sa ulice Mustafe Pintola do mosta Alije Izetbegovića na saobraćajnici Ilidža-Hrasnica završena je. Dužina trase je 1.100 metara, a paralelno s izgradnjom trase urađena je i javna rasvjeta duž cijele trase. Cilj je rasterećivanje saobraćaja u centru Ilidže, te stvaranja pješačke zone Centar Ilidža.

Presijecanjem vrpce u funkciju su je stavili: načelnik Općine Ilidža prof. dr. Senaid Memić, premijer Kantona Sarajevo Adem Zolj, ministar za obrazovanje, nauku i mlade Elvir Kazazović, Mirsad Čaušević, pomoćnik načelnika za razvoj, investicije i komunalne poslove i puteve, te zastupnik u Skupštini KS Mirza Čelik.

“Ovo je cesta koja će Ilidžu napraviti još ljepšom. Zasad je ostalo još samo da zasadimo drvorede i da je koristimo. Korito rijeke Željeznice će biti dato građanima na korištenje za sport, rekreaciju, zabavu... Moramo popraviti sadržaj, kako ekonomski jačamo, tako razvijamo i sadržaje”, rekao je Memić. Cesta koja je građena u tri etape koštala je milion i 700 KM, a KS je u projektu učestvovala oko 400.000 KM. Saobraćajnicom su stvarani uslovi za kreiranje pješačke zone u dijelu do terminala do mosta prema staroj Općini Ilidža. Tako će se otvoriti komunikacija uz rijeku kako bi se bila mogla napraviti pješačka zonu koja bi s Malom alejom činila jednu cjelinu.

ma gradnje i oblikovanja mosta. U zoni ograde predviđeno je postavljanje led linijske rasvjete, te led reflektora, kao i osjetljivije ispod i iznad konstrukcije. Predviđeno je i postavljanje betonskih žardinjera dužinom cijele pješačke staze sa integriranim klupama za sjedenje.





Muzičkoj školi Ilidža uručene vrijedne donacije

Načelnik Općine Ilidža prof. dr. Senaid Memić i ministar za obrazovanje, nauku i mlade Elvir Kazazović, simbolično su uručili 2. oktobra 2018. godine muzičku opremu i instrumente Osnovnoj muzičkoj školi Ilidža.

Kupovinu koncertnog klavira finansirala je Općina Ilidža u vrijednosti 52.000 KM, a 100.000 KM resorno ministarstvo, za nabavku nedostajuće opreme. Ministarstvo je sredstva izdvojilo za nabavku muzičke opreme za sve odsjeke. Kupljene su nove flaute, gitare, harmonike, klarineti, a kabinet udaraljki je opremljen kao nikad do sad. U okviru donacije kupljeni su i računari i projektor, te projekciono platno.

„Sigurni smo da će ovaj vid pomoći učenicima Osnovne muzičke škole Ilidža svakako biti od velike koristi za njihov daljnji razvoj i učenje, na što se složila i direktorica Dijana Preljević, rekavši da je u ime škole veoma zahvalna i da će donacija pomoći učenicima u muzičkom usavršavanju.

Ministar Kazazović naglasio je kako je opremanje ove škole samo jedno u nizu koju je finansiralo ovo ministarstvo te će i ubuduće nastaviti da pomaže sve škole.

Za goste su učenici ove škole izveli prigodan kulturno-umjetnički program.

Ova škola bilježi i 43 godine postojanja i veoma uspješnog rada. Iznjedrila je mnoge generacije uspješnih i danas poznatih muzičara.



Održana fokus grupa sa predstavnicima civilnog društva i vlasti

Centar za promociju civilnog društva u saradnji sa Općinom Ilidža, 19. oktobra 2018. godine organizovao je u prostorijama Općine fokus grupu sa predstavnicima organizacija civilnog društva i lokalne vlasti koji su kroz dijalog potvrdili značaj zajedničkog rješavanja problema unutar zajednice. Svi strateški dokumenti lokalnih vlasti, te njihova implementacija uključuju marginalizovane kategorije društva, posebno mlade kroz direktne komunikacije u mjesnim zajednicama i općinskeim službama.

Fokus je implementiran u okviru projekta Dijalog za budućnost kroz promovisanje društvene kohezije i raznolikosti kojeg zajednički implementiraju UNDP, INICEF i UNESKO na inicijativu i pod pokroviteljstvom Predsjedništva Bosne i Hercegovine čiji je cilj unapređenje saradnje između raznih društvenih i etničkih grupa kroz dijalog, te zajedničku identifikaciju prioriteta u pronalaganju rješenja.



Potpisani ugovori za dodjelu 20 plastenika

Na osnovu Sporazuma zaključenog između Općine Ilidža i humanitarne organizacije „Muslim Aid BiH“ i Pravilnika o utvrđivanju uslova, kriterija i postupaka za ostvarivanje prava na dodjelu, a u okviru realizacije projekta „Ekonomsko osnaživanje socijalno i materijalno ugroženih osoba i mladih kroz proizvodnju povrća u plasticama“ organizovana je dodjela plastenika. Na prijedlog komisije, općinski načelnik je donio odluku o dodjeli plastenika za 20 osoba, površine 100 metara kvadratnih sa kompletnom opremom, sa sistemom za navodnjavanje i sadnicama za jedan proizvodni ciklus čija pojedinačna vrijednost iznosi 2450 KM od toga Općina i „Muslim Aid BiH“ finansiraju po 40 procenta, a odabrana porodica 20 procenta vrijednosti plastenika. Ukupna vrijednost projekta je 50.000 KM. Cilj ovog humanitarnog projekta je smanjenje siromaštva i pomoć ekonomskom oporavku u općini Ilidža, pomaganjem siromašnim porodicama u uspostavljanju održivog poljoprivrednog poduzetništva. U sali Općine Ilidža 29. oktobra 2018. godine, sa kandidatima koji su ostvarili pravo na dodjelu potpisani su ugovori o dodjeli i isporuci plastenika.

„Ovo je najbolji način pomoći građanima, a posebno mladim nezaposlenim osobama i njihovim porodicama, da im omogućimo da sami svojim radom proizvedu hranu za svoje potrebe i na taj način ostvare prihod, što je korisnije nego drugi vid pomoći. Ovo je dobra namjera da se pomogne ljudima koji hoće raditi. Neka vam je sa srećom“, kazala je u svom obraćanju dobitnicima plastenika Sabina Viteškić pomoćnik načelnika za privredu i turizam.

Uskoro novi most na Trnavi

U Vlakovu su započeli radovi rekonstrukcije mosta na potoku Trnava. Izvođač radova je firma MGBH d.o.o. Vrijednost radova je 107.730,56 KM. Dužina je deset metara, a širina četiri i po metra. Rok je 120 dana. Srušen je stari most i u toku je izmještanje instalacije.



Projekat "Važnost i tehnike samopregleda dojki" podržala Općina

Pozitivna priča dešavala se na Ilidži u okviru implementacije projekta "Važnost i tehnike samopregleda dojki" koji realizuje Udruženje "Zdravi tim" i Zdravi portal uz pokroviteljstvo Općine Ilidža. Bila je ovo prilika za mlade djevojke i žene da se zajedno na jednom mjestu dodatno educiraju i govore o tehnikama samopregleda dojki i važnosti u cilju prevencije karcinoma dojke i njegovom ranom otkrivanju. Samopregled dojke može biti najvažniji korak u ranom otkrivanju neke od nepravilnosti i promjene na dojci, a o načinu izvođenja tehnika samopregleda govorila je dr. Melita Adilović, članica Udruženja "Zdravi tim" i ekipe Zdravog portala.

Među učesnicama bilo je i onih koje se već suočavaju sa ovim izazovima, koje su prošle niz operacija i koje su isplivale kao pobjednice i rado su podijele svoja iskustva.

"Ime mi je Anida, rođena sam 1994. godine. U 21. godini su mi otkrili karcinom dojke. Radeći samopregled uočila sam neke nepravilnosti za koje se poslije ispostavilo da imam tu bolest" navela je mlada, hrabra Anida Skenderagić koja je poručila svima da paze na sebe i svoje zdravlje i da se nikada ne treba odustati.

"Ja sam Enisa. Dali su mi prognozu da ću živjeti pet mjeseci. Evo, prošlo je pet godina i ja sam sa vama i pričam o tome. Zapamtite da bolest zaista nije kraj!" navela je Enisa Zulović, autorica knjiga "Bolest nije kraj" i "Novi početak" i dodala kako je osnovano Udruženje i web stranica "Bolest nije kraj" i pozvala prisutne da zajednički jedni drugima daju podršku. Za ove potrebe izrađen je i poseban edukativni letak sa osnovnim koracima pravilnog samopregleda dojki. Projekat je prepoznala i finansijski podržala Općina Ilidža.

Podijeljeno 100 kompleta PVC kanti za domaćinstva

U okviru projekta „Uvođenje odvojenog prikupljanja otpada u individualnim stambenim objektima na području Kantona Sarajevo“ koji realizuje KJKP „RAD“ u saradnji sa Ministarstvom prostornog uređenja, građenja i zaštite okoliša Kantona Sarajevo, 4. oktobra 2018. godine u ulicama 14. septembar, Zaulice i dva kraka ulice Bare u općini Ilidža podijeljeno 100 kompleta kanti za otpad (jedan komplet čine dvije PVC kante) za domaćinstva. Ovakvim načinom prikupljanja otpada u individualnim stambenim objektima građani će odvajati otpad na miješani komunalni otpad koji će odlagati u crne kante i reciklažni ambalažni otpad koji će odlagati u žute kante. Na kantama se nalaze uputstva šta se u njih smije stavljati, a bit će podijeljeni i letci s uputama o pravilnom načinu odlaganja i terminima odvoza otpadal.

Sjećanje na heroje

U organizaciji Udruženja boraca Prva samostalna brigada Stup-Ilidža i Općine Ilidža u prisustvu rodbine, saboraca, prijatelja i pripadnika boračkih udruženja, 8. oktobra 2018. godine na Stupu u Azićima obilježena je godišnjica pogibije heroja Mehe Porobića i Ivica Stanića, dobitnika najvišeg ratnog priznanja „Zlatni ljiljan“. Delegacije boračkih udruženja, Općine Ilidža, Ministarstva za boračka pitanja Kantona Sarajevo i članovi porodica položili su cvijeće na mjesto pogibije na spomen ploču i odali im dužno poštovanje. Meho Porobić pukovnik i načelnik štaba 102. motorizovane brigade pored Zlatnog ljiljana dobitnik je i Ordena za vojne zasluge sa zlatnim mačevima. Poginuo je 8. oktobra 1992. godine u borbi za Aziće. Na istom mjestu život za odbranu države časno je položio i major Ivica Stanić koji je ostao da brani svoje ognjište i komšije, a bio je pripadnik HVO-a. Prisutnima se obrati general Hajrudin Grabovica koji je evocirao uspomene na ove ratne heroje i na te sudbonosne dane kad su se vodile odsutne bitke za odbranu ovih prostora, Sarajeva, a i Bosne i Hercegovine, oktobra 1992.



Obilježena godišnjica

“Operacija oslobađanja Hojte”

U organizaciji Udruženja boraca Četvrte viteške motorizovane brigada Ilidža 29. oktobra 2018. obilježeno je 24 godine od “Operacije oslobađanja Hojte”

Brojne zvanice iz Općine, kantona, bivši komandanti, suborci, oficiri okupili su se kako bi se prisjetili bitke koja je imala veliki značaj za odbranu.

Delegacije su položile cvijeće na spomen ploče heroja Ejuba Sarajkića kod hotela Maršala i na Bijelim vodama Jasminu Čengiću.

U rejonu sela Lukavac na Bjelašnici održan je historijski čas, na kojem su se obratili komandanti Fikret Prevljak i Ismet Hadžić Mutevelija.

General Prevljak evocirao je uspomene o samom značaju bitke, dok je Ismet Hadžić Mutevelija govorio mladim ljudima o značaju obrazovanja i očuvanju tradicije.





Dani mentalnog zdravlja na Ilidži

Centar za mentalno zdravlje RJ Dom zdravlja Ilidža i Udruženje za zaštitu mentalnog zdravlja „MENSSANA“ Ilidža, a u povodu Svjetskog dana mentalnog zdravlja, 10. oktobra 2018. godine u prostorijama službe organizovali su Dane mentalnog zdravlja na Ilidži, koji se ove godine obilježava na temu „Mladi ljudi i mentalno zdravlje u svijetu koji se mijenja“.

Statistika pokazuje da je u Bosni i Hercegovini sve veći broj osoba koje imaju neki od problema s mentalnim zdravljem. Namjera ove kampanje je da se doprinese podizanju svijesti javnosti o važnosti očuvanja mentalnog zdravlja i nužnosti destigmatizacije osoba koje žive s nekom od problema te vrste. Polovica svih mentalnih bolesti započinje u dobi od 14 godina, a većina slučajeva se ne opaze i ne tretiraju se. Sve više djece i mladih pati od depresije. Samoubojstvo je drugi vodeći uzrok smrti među mladim između 15 i 29 godina. Udruženje MENSSANA uzelo je učešće na Konferenciji Mladi i mentalno zdravlje koja je održana u



Hotelu Hills na Ilidži, a u organizaciji Federalnog ministarstva zdravlja, NVO „Projekat mentalnog zdravlja“ i Asocijacije XY. Učešće i podršku u kampanji podizanja svijesti o problemima mentalnog zdravlja mladih dali su i učenici Treće gimnazije Sarajevo i Srednjoškolskog centra iz Ilijaša, te pedagozi i psiholozi iz svih osnovnih i srednjih škola u Kantonu Sarajevo.

U okviru dana i kongresa organizovana je izložba ručnih radova korisnika usluga centra i udruženja.

Realizovan projekat “Zelena učionica”

U organizaciji Udruženja “Aleja” 21. oktobra 2018. godine realizovan je projekat “Zelena učionica”. Učesnici projekta bili su učenici Druge osnovne škole Hrasnica i mladi izviđači Odreda Igman 92. Uz stručno predavanje i interaktivni rad, učesnici su pokazali znanje u odnosu prema prirodi, također stekli novo znanje, koje će primjenjivati u svakodnevnim životnim aktivnostima, prenositi na druge i na taj način dati svoj doprinos u zaštiti okoliša. Projekat je finansirala Općina Ilidža.



Uspjeh Boćarskog kluba “Napredak”

Boćari “Napredak” ostvarili su značajan uspjeh na državnom prvenstvu u boćanju po disciplinama u Grudama. Takmičenje je održano 13. i 14. oktobra 2018. godine. Osman Ganić u discipline pojedinac osvojio je prvo mjesto i postao državni prvak. Vladimir Kanevčev je osvojio treće mjesto i upotpunio uspjeh BK “Napredak”

Omladinci BK “Napredak” nakon niza uspješnih igara u prvenstvu Damir Bajić i Kenan Bašić pozvani su da nastupe za reprezentaciju na međunarodnom boćarskom turniru koji će se održati u Rijeci 15. i 16. decembra 2018. godine.



Obilježen Međunarodni dan starijih osoba

Povodom Međunarodnog dana starijih osoba Crveni križ općine Ilidža je obišao korisnike Doma zastarije osobe Sentivo. Volonteri su se družili i razgovarali sa korisnicima, te im uručili prigodne poklone. Na vidnu radost korisnika, druženje je nastavljeno uz pjesmu i kolače.





Promocija knjige “Novi početak”

U hotelu Hills na Ilidži 17. oktobar održana je prva promocija nove knjige autorice Enise Zulović “Novi početak”.

Ovoj knjizi koja govori, kao što sam naslov kaže, o novom početku nakon borbe sa teškom bolešću, predhodila je knjiga “Bolest nije kraj”.

Prva knjiga je prodana u velikom broju primjerala i promovisana je u velikom broju gradova Bosne i Hercegovine, ali i Evrope. Sudeći po posjeti na prvoj promociji, druga će biti još popularnija. U publici su se mogla vidjeti mnoga draga lica iz društvenog, političkog, privrednog i javnog života Ilidže i Sarajeva.

Kako je rekla autorica Enisa “Nije sramota, nemojte biti svoje bitke sami!”

“Digni glavi, pruži mi ruku, nasmiješi se..., odkud znaš da neće već sutra i tebi isto zatrebati...? A u isto vrijeme dovi da se nikad nikome ne desi nešto slično, rekla je autorica Enisa Zulović.